

Lu fau d' Verzy. [Les Faux de Verzy sour la neige Janvier 2006](#)



- Z'alèz co toudi fwêre vôs pourmon.nades, Emile ? (Tissot de Willerzie)
- Oh, ahy ! La smwin.ne k'est ôûte, dj'ê sté du costé du R'vin, sul « Plateau d' Rôcroi », avu des forestîs francès et dj' ê vû ène vrêye mèrvèye !
- Du cwè k' vous vlèz câzer ?
- D'ène hèsse (*hasse=hêtre*) coume dju nn'avos jamwès pont vû. Imajinèz-v' ène hèsse du 2-3 mètes du hiôt, ascôchîye coume ène

couvresse, avu les branches ki pindint t' âtoû an rond jusk' à tère, et les foyes si sêrêes k'on n'ârot sû vèy oûte.

- Vous m'intriguèz, Emile !
- Dj' î astos ostant k' vous. C'est bon k' les gârdes m'ont èspliké ku ç'ère ène sôrte du hèsse "tortillard", des pus râres sul payis et k'avint leus orijines dins in grand bwès domanial du costé d' « Reims », an Champagne, ou viadje de Verzy. C'est pou ça k'on l' loume : « Lu fau d' Verzy. »

I n' a falot nin d'pus pou k' al nute,dju plondje su l'indjole (*ordinateur*) et mète « Google » a l' ovradge.

Cè k' dj' î ê duscovru, dju nul pus nin tnu pour mi tout seû. Fât k' dju vz à caze.

Ces hèsses la, coume l' Emile a-n è vu yink, du toute la tère, nu su rascontrat pou bin dire, ku dlé Reims, dins la forêt d' Verzy, in viadje dul montagne du Reims (288 m.), nin lon dul vòye ki va su Châlons en Champagne, a tirant in pô su Epernay.

I gn avot la, ou VI^o siéke, dins çu viye forêt domaniale dul « Comandrie du Temple », in moustî (*monastère*) du nom du Saint-Basle k'avot sté demarè an 664 pa Sint Nivard.

La léjande raconte ku les mwanes, su leu passadje, plantint toudi des hèsses et ku ça ârot sté ène malédicsion avoyê pou puni les djins d' Verzy.

Lu vrê nom du l'âbe, ku Pépin lî è dné an 1861 est : FAGUS SYLVATICA L. VAR. TORTUOSA PEPIN. C'est assez dire ku c'est crawiyeu, et nin in pô. Sitot kul pîd û k'ène brantche è in pô créchu, ile fwêt keude su keude dins tous les sans. C'est pou ça ku nost' âbe nu vint nin bin hyôt, mès k'i créche putot coume in parasol û in parapuye. I foye pus târd ku les ôtes hèsses, les foyes sont pus ptites et pus sêrêes su les poûsses du l'annéye. Et coume i créche mwinsse vite ku lz'ôtes, i prind vite la forme d'in parapwê cand i dvint vî et d'ène couvresse cand il est pus djon.ne.

I srot kèstion d'ène mutacion k'ârot amon.né in tel comportumant.

On-z èstime ku les pus vîs des ôbes, les cîs ki vnat d' pèri, ârint atère 350 et 500 ans. C'est nin ôjî dulz î compter les créchin.nes.

Si c'est à Verzy k' onz à rasconture lu pus dins l' monde (668 an 1977 et coume 800 asteure), il a vint kékinkes ossi a l'Almagne, du costé du Hanovre, in pô dins l' Sûd doul Suwède et plic-ploc ou Danemark.

Cand on-z à rasconture dins les bwès francès, gn è nin yink pou dire coumint k' ils ont vnu la.

L' Université d' Montpellier (professeur Bernard Thiébaud) è kèru et è trouvé des difèrances dins les « gènes » du l'âbe. Les grin.nes k'il è rsamé et k' ont bin vlu yèsse fertiles, ont dné des hèsses normales, des crawiyeuses et des mitan-mitans, mès la rèyussite est lon d'èsse valabe.

Coume les branches du fau d' Verzy pindat jusk' à tère, ses branches su marcotat êjîmint, minme naturèlmint ; et ces marcotes la créchat tout ossi crawiyeuses, minme si on les rpike pus lon, din in parc û ôte pàrt.

La vnue, à si grand nombe, de toutes ces hèsses crawiyeuses è bin chûr ragûjî les vîyes croyances et les léjandes.

Bin dvant la fondâcion du moustî St Basles a 664, (on-z î è rtrouvé ène hatche « préhistorique »), gn ârot dja yu in vî culte ku les Celtes ârint yu rindu a Baal, yène du leus divinités.

Ou Moyin-Âdje, la croyance vlot ku les faus d' Verzy astint ène malédicsion k'ârot sté avoyîe pa Baal, lu dieu celte dul tounoûre, pou puni les djins d' Verzy. Poucwè ? Is nul dijat nin. Mès, i gn'è ène conivance atère lu nom du « BAAL » et l' cî du vî mousty du « SAINT BASLES ». La ké ???

Co anute, des croyances s'aspyat su les 5 crwâs des faus (ène blantche, ène nwâre, ène vède, ène roudje et ène djâne) ku les mwanes ârint planté dins ces bwès là âtoû du viadje de Verzy.

Is fjat intrevunu des vîs usadjes chinwas ; il î srot kestion d' lumîre du djoû, des ékinocses, des 5 èlèments, des rézôs solêres et tèresses, des mouvments dul tère et k'a sêdje ?

Des ôtes prètantat vèy in signe pasku les Rwas d' France k'on sacrot adon à Reims, vunint priyî dins ces bwès-là lu djoû du dvant.

Lêchans don ces croyances-la d' costé. Wèyans seulmint les faus d' Verzy coume ène curiosité dul nature ku, d'ayeurs, les forestîs sougnat âs ptits ougnons. Et c'est fwârt bin insi.

L.Baijot 1/11/2003

